



Senin, 02 September 2024

Ogen: Kejadin 25:22-26



"Jadi Nande"



Jadi sekalak nande e me ketedehen ate kerna diberu si enggo erjabu. Nggejabken keajaipen kegeluhen si turah i bas bertin e desken sada pemere perkuah ate si mbelin. Tapi labo kerina proses kehamilen seri. Lit diberu si biasa saja asum natang tuah, lit si tambah gegehna tapi labo ka sitik si mesui akapna mupus. Bas bidang kedokteran pe megati proses kehamilen e ibagi telu fase. Trimester pertama usia kandungan 1-3 bulan, e me tahap awal si rawan keguguren, trimester peduaken usia kandungan 4-6 bulan enda nggo mulai megegeh gia lit ngidam-ngidam, trimester petelukan 7-9 bulan e masa-masa nggo mulai megegeh janah bayi pe nggo lit bentuk sempurnana.

Proses kehamilen Ribka, melampaui kesemalen. Mulai gejabna lit kegeluhen i bas bertinna, anak i bas bertin e nggo situlak-tulaken, banci jadi seh maka nggo mesui iakap nandena tapi langa seh paksana, e maka mbiar, mesui ras aru atena. Nungkun ia man Tuhan kerna kecibalna, ngkai maka bangenda? Penungkunenna e ialoi Tuhan. IturikenNa erti kiniseran Ribka i bas ia natang tuah e, eme perban Dibata mpersiapkan dua bangsa si mbelin arah kesusuren Ribka ras Ishak. Janah kai si ipadanken Tuhan e, teridah alu tangkas maka tuhu pelain-lain kal biak anakna si kembar e. Sada ermbulu, si sada nari bagi danak-danak si semalna. Duana beda karakterna, sada perkelis perburu, sada nari teneng i tenda. Jadi nande menaken paksa natang tuah seh i bas pebelin-belin anak labo menukah, amin bage gia enda sada anugerah. Arah Ribka kita erlajar, jadi nande memang labo menukah, labo ka murah, tapi i ja lit kiniseran i je lit ate Tuhan mekuah. I bas la ngasupta e, labo dalih guna jujur iadep-adepen Tuhan, nuduhkan uga situasi pusuhta, tapi bere kesempatan man Tuhan guna mpegegehi kita alu padanNa. Megahlah si akap maka kita jadi nande. Jadi nande eme karir si mehulina, si erbahansa kita la pernah ngadi erlajar. Janah lit upahta e me jadi nande man anak-anakta.